



ЎЗНОМА
1930 ЙИЛ
12 МАЙДАН
ЧИҚА
БОШЛАГАН

Тасвир

№ 103 (2367)

1991 ЙИЛ 27 АВГУСТ

СЕШАНБА

БАҲОСИ 10 ТИЙИН

Совет Социалистик Республикалари Иттифоқи Президентининг ФАРМОНИ

СОВЕТ ИТТИФОҚИ КОММУНИСТИК ПАРТИЯСИ-
НИНГ МОЛ-МУЛКИ ТУҒРИСИДА

1. Халқ депутатлари Кенгашлари КПССнинг мол-мулк-
кени муҳофазага олсинлар. Бундан буён ундан фойдала-
ниш масалалари мол-мулк ва жамоат бирлашмалари туғ-
рисидаги СССР ва Республикаларнинг қонунларига қатъ-
ий мувофиқ равишда ҳал қилиниши керак.

2. Амалдаги қонунларга биноан халқ депутатлари Кен-
гашлари ўз фаолиятини тўхтатадиган партия қўмиталари
ходимларини ишга жойлаштириш ва уларнинг ижтимоий
таъминоти чора-тадбирларини кўрсинлар. Ҳуқуқни му-
ҳофаза қилиш идоралари ва бошқа давлат идоралари
фуқаролик ҳуқуқларининг бирон-бир тарзда бузилишига
йўл қўймасинлар.

Совет Социалистик Республикалари Иттифоқи
Президенти **М. ГОРБАЧЕВ.**
Москва, Кремль.
1991 йил 24 август.

Совет Социалистик Республикалари Иттифоқи Президентининг ФАРМОНИ

СССР ҚУРОЛЛИ КУЧЛАРИДА ВА ҲУҚУҚНИ МУҲО-
ФАЗА ҚИЛИШ ИДОРАЛАРИДА ҲАМДА ДАВЛАТ АП-
ПАРАТИДА СИЕСИЙ ПАРТИЯЛАР ВА СИЕСИЙ ҲА-
РАКАТЛАРНИНГ ФАОЛИЯТИНИ ТЎХТАТИШ ТУҒРИ-
СИДА

1. СССР Қуролли Кучларида, СССР Ички ишлар ва-
зирлигида, СССР Давлат хавфсизлиги қўмитасида, ҳу-
қуқни муҳофаза қилувчи бошқа идораларда, темир йўл
қўшинларида ҳамда бошқа барча ҳарбий тузилмаларда
ва давлат аппарати органларида сиёсий партияларнинг
ва сиёсий ҳаракатларнинг фаолияти тўхтатилсин.

2. Мазкур тузилмалар ва идораларда ишлаб турган
сиёсий партиялар ва сиёсий ҳаракатларнинг аъзолари ўз
сиёсий фаолиятда қатнашиш конституциявий ҳуқуқини
шу органлардан ташқарида ва хизматдан ташқари вақт-
да амалга оширадilar.

Совет Социалистик Республикалари Иттифоқи
Президенти **М. ГОРБАЧЕВ.**
Москва, Кремль.
1991 йил 24 август.

Ўзбекистон Совет Социалистик Республикаси Президентининг ФАРМОНИ

Мамлакатда вужудга келган аҳволни эътиборга олиб ва
республика манфаатларини ҳимоя қилиш мақсадида:

1. Республика Ички ишлар вазирлиги ва давлат хавф-
сизлиги комитети Ўзбекистон ССРнинг қонуний тасарру-
фига олсинлар.

2. Мазкур идораларнинг раҳбарлари икки ҳафта муддат
ичида Ички ишлар вазирлиги ва давлат хавфсизлиги коми-
тети органларининг мақоми ҳамда низомини қайтадан кў-
риб чиқиб, биринчи навбатда республика ва унинг фуқа-
ролари хавфсизлигини, манфаатларини муҳофаза қилишни
назарда тутсинлар.

3. Республика ҳудудида жойлашган СССР Ички ишлар
вазирлигининг ички қўшинлари бевосита Ўзбекистон ССР
Президентига бўйсундирилсин.

4. Ўзбекистон ССР Олий Кенгаши Раёсатига жуда қис-
қа муддатда республиканинг давлат мустақиллиги туғри-
сидаги Қонун лойиҳасини тайёрлаш ва уни Ўзбекистон
ССР Олий Кенгашининг навбатдан ташқари сессияси му-
ҳокамасига тақдим этиш таклиф қилинсин.

5. Ўзбекистон ССР Ички ишлар вазирлиги, давлат хавф-
сизлиги комитети, прокуратураси ва адлия органлари,
шунингдек республика ҳудудида жойлашган ички қўшин-
лар, Туркистон Ҳарбий округи қисмлари ва қўшилмалари
партиядан ҳоли қилинсин.

Белгилаб қўйилсинки, бундан буён юқорида кўрсатил-
ган органлар ва муассасаларда сиёсий партиялар ва ҳара-
катларнинг янги ташкилий тузилмаларини вужудга келти-
ришга йўл қўйилмайди.

6. Мазкур мақамаларнинг раҳбарлари давлат ҳокимия-
ти ва бошқаруви идоралари билан биргаликда ушбу Фар-
мон муносабати билан ишдан бўшайдиган шахсларни ишга
жойлаштириш учун барча чораларни кўрсинлар.

Ушбу Фармон имзоланган пайтдан бошлаб кучга қиради.
Ўзбекистон Совет Социалистик
Республикаси Президенти
И. КАРИМОВ.

Тошкент шаҳри,
1991 йил 25 август.

«Одамхўр ушландими ёки йўқми?»

Шу йил 20 август куни рўзномамизда бутунит-
тифоқ қидирувида юрган Николай Жумағалиев
тақдирига боғлиқ шов-шувлар хусусида бир оз
тўхталибдик. Айни чоғда «Постда»нинг яқин кун-
лардаги сонларидан бирида бу ҳақда батафсилроқ
маълумот беришни ваъда қилгандик.

1. ТУНГИ ШАРПА

Янгиқишлоқ Фарғона ту-
мани марказидан 17 кило-
метр олисда жойлашган
мўъжазгина гўшалардан
бири. «Мўъжазгина» дегани-
мизнинг боиси — бу ерда
атиги 94 оила истиқомат
қилади.

16 апрелга ўтар кечаси
шу қишлоққа ўғри оралади.
У дастлаб Қулмирза Қувва-
тов хонадонига «ташриф
буйурди». Худди арвоқлар
монанд оҳиста ҳаракат қи-
либ, 3 минг 500 сўмлик уй
жиҳозларини ўмарди. Кейин
оёқ учуда юриб, Мамаши-
риф Юсуповникига кириб
борди. У ердан ҳам 1 минг
600 сўмлик буюмларни гум-
дон қилди.

Худди шунингдек, Ғулмо-
жон Қодиров, Абдуҳамид
Эрматовларнинг хонадони-
ни ҳам назардан четда қол-
дирмади. Ҳар икки уй эга-
лари ширин уйқуда эканлик-
лари учун ярим кечада
номаълум кўланка тимирс-
киланиб юрганини мутлақо
сезишмади.

— Мен ҳам даставвал
аҳамият қилмабман, — дей-
ди уч боланинг онаси Зебо-
хон, — лекин қўшни хонада
нимадир «қитир-қитир» қи-
лаверди. Мушук кириб қол-
гандир, деган хаёлга бор-
дим. Турмуш ўртоғим
(Абдумуталиб Эрматов)
икковимиз кириб қарасак,
кўча тарафдаги дераза очи-
либ қолган экан...

Шу сабаб бўлди. Ярим
кеча эканлигига қарамай
эркаклар бир зумда оёққа
туришди. 25-30 чоғли одам
тўпланди. Улар икки гуруҳ-
га бўлиниб, ўғрини қидира
бошлашди.

Ниҳоят, хув нарида шоши-
либ кетаётган бир шарпа
кўринди. Улар тўхташни
буйиришгач, ўзини қалин
туздорга уриб, кўздан йў-
қолди.

— Йигитлар, икки-уч йил-
дан бери қишлоғимиздан қўй
ўғирланади, — деди ҳам-
қишлоқлардан бири. — Тут-
зорга яширинган кимса ўша
ўғри бўлса, ажаб эмас. Ни-
ма қиламиз?

— Қидириб топамиз, —
дейишди бошқалар. — Бир

таъзирини бериш керак!

— Унда эҳтиёт бўлинглар,
қуролланган бўлиши ҳам
мумкин!

Тумандаги учинчи авто-
корхонага қарашли ёрдамчи
хўжаликда ишлайдиган
Абдувоҳид Эрматов жи-
ноятчига биринчи бўлиб дуч
келди. Ўн-ўн беш қадам на-
рида пайдо бўлган сариқ
курткали одам тобора узоқ-
лашиб борарди.

— Дастлаб чўчиб туш-
дим, — дейди Абдувоҳид
бесаранжомлик ва таҳлика
билан ўтган ўша тунни хо-
тирлаб. — Кейин ўзимни
қўлга олдим. Бошқаларни
ёрдамга чақирдим. Сариқ
курткали шахс эса тирақай-
лаб қоча бошлади. Бир пайт
тўсатдан орқасига ўтирилди.
Варанглаб ўқ узилди. Ўнг
курагим ачишиб кетди. Уму-
ман, у бизларга қарата ҳам-
маси бўлиб беш марта отди.
Исроил Турдиматов деган
йигит бор, у ҳам қўлидан
яраланган ўшанда.

Халқимизда шошганда
лаббай топилмас, деган нақл
бор. Ўша куни эндигина «З
баҳорни қаршилаган Комил-
жон Нодировнинг шошиб
қолганини ҳанузгача беғубор
кулги билан эслашади. У
ўғрини тутзордан чиқиб,
шудгор томон қочса керак,
деб тахмин қилганди. Адаш-
ган экан, бундай бўлмади.
Олазрак ўғри бедапоёга
қараб жон-жаҳди билан ив-
тилди. Орқасида эса оломон.

Комилжон ёш, бақувват,
чаққон эмасми, бир зумда
уни қувлаётганларга етиб
олди ва ҳатто ўзиб ҳам кет-
ди. Кейин шундоққина ёни-
да ҳансираб чопайтган киши-
га хиёл бурлиб сўради:

— Худойберди ака, ўғри
қани ўзи, кўздан йўқотиб
қўйдим!

«Худойберди»дан сас-садо
чиқмади. Орқадан ҳаллос-
лаб эргашаётганлар эса:

— Комилжон, ушламай-
санми ўғрини? Ахир, у
ёнингга-ку! — деб қичқир-
шарди.

«Худойберди» эса қўлга
тушмаслик мақсадида ён
томонга бурилди ва янада
тезроқ чопаверди.

Юқорида айтилганидек,
ўғри таъқиб қилувчиларга
қарата беш марта ўқ узиб,
икки кишини яралади. Яна
отмоқчи эди. Лекин бўлма-
ди. «Тоз-8» белгили милтиғи
негадир ишламай қолди.
Шунда у ён-атроф қоп-қо-
ронғи эканлигидан фойдалан-
ди. Сакраб сувсиз ариқча
биқинди. Ҳар эҳтимолга
қарши пичоғини чиқариб ёни-
га қўйдида, милтиқни соз-
лашга тутинди.

Йўқ, улгурмади. Ҳамқиш-
лоқлар ўқ шаклидаги ажал-
дан ҳам чўчимай унга яқин-
лашишди. Кейин саросимада
қолган ўғрини тутиб, қўл-
оёғини яхшилаб боғлаб, ма-
ҳалла чойхонасига келти-
ришди.

— Ўша куни туман ички
ишлар бўлимида мен опера-
тив навбатчи эдим, — дейди
милиция майори Шокир ака
Мажидов. — «Тез ёрдам»-
дан қўнғироқ қилишди. Ха-
бар қилишларича, Янгиқиш-
лоқ одамлари милтиқ ўқидан
яраланган Абдувоҳид Эрма-
тов исмли йигитни олиб ке-
лишибди.

Телефон дастасини жойига
қўйишга ҳам улгурмадим.
Жиққа терга тушган икки
киши кирди. Янгиқишлоқ-
ликлар битта ашаддий ўғри
ни тутиб олганларини ай-
тишди.

ИИБ бошлигининг ўринбо-
сари милиция капитани Еқуб-
жон Маҳмудов раҳбарлиги-
даги гуруҳ воқеа жойига
етиб борди. Чиндан ҳам ўғри
оёқ-қўли борланган ҳолда
ётар, одамлар даргазаб эди.

— Уни машинага чика-
риб олдик. — дейди Еқуб-
жон Маҳмудов алам аралаш
қулиб, — лекин қанийди
машина тезроқ ўт олса!
Эскини эплагунча эсинг ке-
тар, деганларни юз фоиз
тўғри экан. Хайрият, ўғри-
ни тутган одамлар «хай-
хай»лашиб итариб юргизиш-
ди...

Туман ИИБда жиноятчи
ўзини Николай Еспалович
Азилгобаев деб таништирди.
Шу туман прокурови руҳ-
сати билан қамокқа олин-
гандан кейин эса Хитой
халқ жумҳурияти фуқароси
НАРИМОН МАЙКОВИЧ
АҒАҚОВ эканлиги хақида
кўрсатма берди.

2. У КИМ ЎЗИ?

Шу кунларда вилоят мар-
казида жойлашган 10-тергов
ҳибсхонасида Наримон Май-
кович Абаков ётибди. У
ЎзССЖ жиноят мажмуаси-
нинг 125-моддаси 3-қисми,
15-ва 81-моддалари асосида
ўғирлик ва фуқаролар ҳа-
ётига суиқасд қилишда айб-
ланапти. Бу ҳақда рўзно-
мамизнинг 20 август кунги
сонида ёзган эдик.

(Давоми 3-бетда).

ВАЗИФАЛАР БЕЛГИЛАНДИ

Кеча ЎзССЖ ИИВда йнги-
лиш бўлиб ўтди. Унда мам-
лакатда вужудга келган аҳ-
волни эътиборга олиб ва рес-
публика манфаатларини ҳи-
моя қилиш мақсадида Ўзе-

кстон ССЖ Президенти И.
А. Каримов 1991 йил 25-августда
имзолаган Фармон талаб-
лардан келиб чиқадиган ва-
зифалар муҳокама қилинди.
Бу ҳақда жумҳурият ички иш-

лар вазири генерал-майор
В. М. Камолов сўзга чиқди.

Жумҳурият Президентининг
Фармони ижросини таъмин-
лаш чоралари белгиланди.

ЙУЛ ИНТИЗОМНИ ЕҚТИРАДИ

Йўлингиз беҳатар бўлсин

Одатда ички ишлар ходимлари тўғрисида матбуотда кам ёзилади. Осовишталик посбонлари тунларни кунларга улаб ишласаларда, уларнинг меҳнатлари ҳамма вақт ҳам ҳақиқий баҳосини топавермайди. Аслида бизнинг осовишталигимизни, тинч-тотувлигимизни таъминлаб турганлар ўшалар. Милиция ходимларининг фаолияти ҳақида Ульянов тумани ИИБ давлат автомобил нazorияти бўлини маси бошлиги милиция капитани Шўҳрат Иронов билан суҳбатлашдик.

— Шўҳрат ака, суҳбатни сарҳисобдан бошласак. Шу йилнинг ўтган олти ойида қандай ишларни амалга оширдиларингиз?

— Ошкоралик даври бўлганлиги сабабли ҳамма нарса очиқ-ойдин айтган яхши. Автофалокатларнинг сони камайиш ўрнига ортиб борапти. Бунга мисол тариқасида ушбу рақамларни келтираман. 1990 йилнинг олти ойи мобайнида 1434 марта йўл ҳаракати қондаги бузилганлиги қайд қилинган. Жорий йилда эса бу кўрсаткич 2673 тани ташкил етаяпти. Шуниси ачинарлики, маст ҳолда машина бошқараётганлар ҳам учраб турибди. Ўтган олти ойида 25 нафар рулдаги ҳайдовчининг кайфи баландлигини аниқладик. Улар меҳнат қилаётган хўжалик, корхона, ташкилот ва муассасаларга хат жўнатганмиз. Раҳбарлар ҳайдовчиларнинг қилмишларини жамоа ўрта-

сида муҳокама қилиб, бизга жавоб йўлладилар.

— Автофалокатларнинг кўпайишига асосий сабаб нима?

— Биринчи навбатда ҳайдовчиларнинг эътиборсизлиги, йўл ҳаракати қондасига тўла риоя қилмасликлари сабаб бўлмоқда. Айрим ота-оналар ҳали балоғат ёшига етмаган «эркатой» фарзандларига машинага ёки мотоциклларни бошқаришга рухсат беришади. Йўл қондасини яхши билмаган бундай ёшлар кўнгилсиз воқеаларни содир этишяпти. Ҳозиргача туманда 29 та автофалокат содир бўлди. Бунинг натижасида 4 киши ҳаётдан бевақт кўз юмди. 28 киши эса оғир тан жароҳати олиб, касалхонага ётқизилди. Ўрни келганда шу нарса алоҳида қайд этмоқчиманки, айрим ҳайдовчилар жиноят содир этиб, жабрланувчига дастлабки ёрдам кўрсатиш ўрнига қандай бўлмасин воқеа содир бўлган жойдан тездагина «қўён» бўлишга шошилишади. Бу билан улар ўзлари содир этган жиноятни янада оғирлаштирадилар.

— Туманда автофалокатларнинг олдини олиш учун қандай ишлар амалга оширилляпти?

— Йўл ҳаракати қатнови мунтазам суратда назорат қилиб бориляпти. Майма-ноқ ва Хўжахайрон қишлоқлари ҳудудларида ДАН ходимлари рейдлар уюштиришяпти. Бундан ташқари ҳар бир корхона ва ташкилотларда тушунтириш иш-

лари олиб бориляпти.

Давлат машинасида шахсий манфаати учун фойдаланадиган шофёрлар ондасонда бўлсада учраб турибди. Ҳозиргача ана шундайлардан 28 нафари ушланиб, белгиланган тартибда маъмурий чоралар кўрилди.

— Техникаларни назоратдан ўтказиш қандай яқунланди?

— «Пахтакор», «Қашқадарё», Дзержинский номидаги давлат хўжаликлариде бу ишга алоҳида масъулият билан ёндашилганлиги кўзга ташланди. Автомашиналар кўришга ҳар томонлама шай қилинган.

— Носоз уловлар ҳам аниқландими?

— Ҳа, албатта. Гуруч курмакис бўлмайдиган, деганларидек техника кўришга ўта эътиборсизлик билан қараган хўжалик ва корхоналар ҳам йўқ эмас. «Ўзбекистон Комсомол 50 йиллиги» давлат хўжалиги, Ульянов номидаги пахта тозалаш заводи, «Қаршиқурилиш»нинг туманидаги 2-автокорхонаси шулар жумласидандир. Бу хўжалик ва ташкилотларда кўришни муваффақиятли ўтказишга етарлича эътибор берилмаган. Мутасадди раҳбарлар ўз бурчларига совуққонлиги туфайли ана шундай кечириб бўлмас ҳоллар вужудга келяпти.

— Шўҳрат ака, муштарийларни энгил автомашиналарга тўланадиган давлат солигининг кўпайганлиги қизиқтиради.

— Бугунги кунда ҳамма ана шу савол билан бизга

мурожаат қилапти. Автомашиналарнинг давлат солигини кўпайганлигини изоҳлаб бериш учун кўнгириқлар бўлмоқда. Шахсий транспорт воситаларининг ҳар бир от кучига 2 сўмдан, давлат ихтиёридаги техникаларнинг ҳар бир от кучига 4 сўмдан солиқ тўлаш белгиланган. Давлат солигининг ошганлиги фуқароларга бирмунча қийинчиликлар келтириб чиқарапти. Улар уловларини техника кўригидан ўтказишни унчалик ҳам хоҳлашмаяпти.

— Ишда камчиликлар, муаммолар ҳам бўлса керак?

— Албатта. Иш бор жойда камчилик, муаммо бўлиши табиий. Аввало, ДАН ходимлари техника билан таъминланмаган. Йўл назорияти ходимларига учта мотоцикл берилган, холос. Қолганлари ўзларининг шахсий автомашиналаридан фойдаланишяпти. Техника тараққий этган даврда яшаймиз-у, машиналарнинг тезлигини ўлчайдиган асбоб бизда ҳанузгача йўқ. Бундан ташқари машинадан чиқадиган заҳарли газ микдорини аниқлайдиган асбобнинг йўқлиги ҳам бизни қийин аҳволга солиб қўймоқда. Уйлайманки, бу муаммолар яқин ўртада ҳал этилади.

— Муштарийларга тилакларингиз.

— Ҳамиша йўллари беҳатар бўлсин.

Суҳбатдош
М. ЖўРАЕВ.

«ОДАМХЎР УШЛАНДИМИ ЁКИ ЙЎҚМИ?»

(Давоми. Бош 1-бетда)

Айни пайтда, ишончимиз қомилки, рўзномамиз ихлосмандларини битта савол қизиқтирапти. Ҳибсхонада ўтирган Абаков ўша қонхўр Жумағалиевми ёки йўқми?

Ана шу савол билан Фаргона тумани прокуратураси терговчиси адлия кичик маслаҳатчиси Холиқберди ака Мамажоновга мурожаат қилдик.

— Мен Абаковга нисбатан кўзгатишган жиноий иш билан 29 майдан бери шуғулланман, — дейди у киши ва кутилмаганда сўраб қолди. — 9 август кунни кечкурун Марказий Телевидениенинг «ТСН» (Янгилеклар телевизион хизмати) кўрсатувини кўрдингизми?

— Йўқ, афсус...

— Ўзим ҳам қандайдир беҳабар қолибман. Лекин прокуратурада котибаси Флора Низомиддинова кўрибди. Шошилиб менга сим қонди. «Холиқберди ака, ҳозир телевизорда бутунитифоқ қидирувида юрган одамхўр Жумағалиевнинг суратини кўрсатишди. У сиз шуғулланаётган Абаковга жуда ҳам ўхшаш...» — деди.

Бу ишни чуқурроқ суриштирдик. Кейин ИИБ орқали Москвага мурожаат қилдик. Қарангки, у ердаги мутахассислар ҳам гумонимизни тўғри, деб тасдиқлашди. Абаков ва Жумағалиевларнинг бармоқ излари айнан битта одамники экан.

Прокуратура терговчининг яна айтишича, Абаков жуда пихини ёрганлардан. Дастлаб қўлга тушганда, ўзини Николай Еспалович Азилгараев деб таништирганди. Шу ерда эътибор беринг: Азилгараевнинг ҳам, Жумағалиевнинг ҳам исми-шарифи бир хил — НИКОЛАЙ ЕСПАЛОВИЧ. Қолаверса, ҳар иккови ҳам бир вақтда — 1952 йил 1 январь кунни турилган.

Шундан кейин Абаков билан учрашишга муваффақ бўлдик. Озғин, бўйи баланд, ранглари заҳил, кўзлари эса бежо боқади. Тез-тез қоплама тишлари орасидан тилини чиқариб, лабларини ялаб қўяди. Ҳаммасидан ҳам ўзини ниҳоятда хотиржам тутиши таажжублантиради кишини.

— Ўша кунни ўғирлик қилгансиз. Устига-устак милтиқдан ўқ узиб, икки кишини яралагансиз. Буни қандай баҳолаш мумкин?

— Бошқа иложим йўқ эди. Йигирма чоғли одам ортимдан қувиб келарди.

— Демак, сиз Жумағалиев эмассиз, шундайми?

— Нималар деяпсиз? Мен Хитой фуқароси Абаковман.

— Кўрдингизми, — дейди терговчи қошларини чиқариб. — У яна бизни чалғитмоқчи бўляпти. Лекин касал яширилса, иситмаси ошкор қилади. Уни чуқур ўрганиб, Жумағалиев эканлигини тасдиқловчи қўшимча маълумотлар тўплашимиз керак. Ишонаман, бу мақсад амалга ошади.

— Унда Сиз орқали бу жараёндаги янгилеклар билан «Поста» ўқувчиларини иложи борича мунтазам таништириб борсак, нима дейсиз, Холиқберди ака?

— Яхши, келишдик.

Раҳмонали ҚОСИМОВ,
«Поста» муҳбири.

Инспекторлар доғда қолмади


22 июнга ўтар кечаси Норин тумани Жўжа қишлоғида хавфли жиноятчи қўлга туширилди.

Соат тахминан икки яримлар эди. Шу қишлоқда жойлашган ДАН постда хизмат вазибаларини бажараётган Наманган вилояти ва шаҳар ИИБ ДАН инспекторлари эътиборини катта тезликда келаятган энгил автомашина ўзини деразадан ташқарига олди. Яна қув-қув бошланди. Бироқ ҳали шахси аниқланмаган кимса яширинишга улгурди. Уни таъқиб қилаётганлар эса атрофини назоратга олиб, қидирувни давом эттиравердилар.

Б. Адашев кўп қаватли уйлар рўпарасидаги оморчалар оралигини кўздан кечираётиб, қочоқнинг шу ердалигини пайқайди. Бу сафар инспектор доғда қолмади...

Наманган шаҳар прокуратурасининг катта терговчиси А. Юсуповнинг хабар беришича, ДАН ходимлари қўлга туширган М. исмли шахс хавфли жиноятчи экан. У ўша кунни ўзининг ёвуз иятинини тезроқ амалга ошириш учун Оҳангарон туманида «ГАЗ-24» автомашинасини бошқариб бораётган кишига ҳужум қилиб, уловини тортиб олганлиги ҳам аниқланди. Жиноятчи ўша пайтда наркотик модда таъсир остида бўлган.

Неъматжон МАМАЖОНОВ,



Пойтахтимизнинг Акмал Иронов туманидаги Фарҳод кўчасида қатнов ниҳоят жадал. Туман ички ишлар бўлими давлат автомобиль назорияти йўл-патруль хизмати инспектори милиция старшинаси Фаттоҳ Муталов бунини эътиборга олган ҳолда навбатчиликни ўтказди. Унинг диққатидан бирон-бир қўпол қондабузарлик четда қолмайди. Шу билан бирга йўл ҳаракати қатнашчилари билан ўта хушмуомалада бўлади.

Суратда: милиция старшинаси Фаттоҳ Муталов йўл осовишталигини таъминлаш бўйича бурчнинг ўтамоқда. ҲАКИМ СОЛИҲОВ олган сурат.

ШОШҚАЛОҚЛИК ОҚИБАТИ

Айб ҳайдовчи Улугбек Қўшоқовда эди. Тепловоз машинисти Ҳожиматов бу кўнгилсизликнинг олдини олиш учун ҳаракат қилиб кўрди, лекин бу ҳаракатдан бирор нарса чиқмади. Автомобилда ўтирган 1989 йилда туғилган Сардорбек шу пайтнинг ўзидаёқ ҳалок бўлди. Абдулла ва Улугбек-

лар оғир тан жароҳати олганлари туфайли шифохонага ётқизилдилар.

11 август кунни эса ҳудди шундай кўнгилсиз ҳодиса Тошкент шаҳрининг Бобур кўчасида рўй берди. Кечаси соат бирларда «ВАЗ-21063» белгили И 09-86 ТН рақамли автомобиль ҳайдовчиси Юсуфали Алиқеров темир

йўлдан ўтиш чоғида қондан қўпол равишда бузди. Афсуски, «ТГМ-4-А» белгили 2624 рақамли тепловоз машинисти Содиқовнинг оғир составини тўхташтишга ўриниши ҳам бежиз бўлди. Натижада 4 киши бир аҳволда шифохонага келтирилди.

Ҳа, шошқалоқлик кўпинча ана шундай тузатиб бўлмас кўнгилсизликлар келтиради кишига.

Анвар НАЗАРОВ.

Шу йил 10 август кунни чамаси соат 13дан 30 дақиқа ўтганда Шаҳрихон туманида киши қалбини туманда соладиган даражада мудҳиш автофалокат юз берди. Менин номли жамоа хўжалигининг 7-бригадаси ҳудудидаги темир йўлни кесиб ўтган жойида «ВАЗ-21013» белгили И 92-94 АН рақамли автомашина «М-71» белгили тепловоз билан тўқнашиб кетди.

Қусмоғи бор емоқ

Яна туман тушди. Оқ зулмат касридан атиги икки қадам нарини кўриш амри маҳол. Учи рутубатли қиш осмонига қадалган яланғоч дарахтлар, ҳосилдан бўшаб, тин олаётган далалар сеҳр-гарнинг бир ишораси билан узлатга чекингандек туюларди. Тоғни урса, майин талқонга айлантирадиган Нуриддиннинг хуноби ошди. Ул дегани одам топилмайди. Суриштирмасдан аҳолига улов хизмати кўрсатиш тармоғига ҳайдовчиликка кирган экан, мана гижинглаган «ГАЗ-53» бехудга қантарилиб ётибди. Режани эса бажариш шарт.

— Об-ҳаво расволигида қайси аҳмоқнинг кўзи учиб турибди менга, — тўнғиллади у. — Ҳозир ким ҳам кўчага чиқарди? Шошма...

Нуриддин лабидан учган сўнги сўзни беихтиёр такрорларди: «Ким ҳам кўчага чиқарди?» У чиқарди. Машинанинг моторини ўт олдири-ю, кеча кўнглига гулгула солган ниятни амалга ошириш сари отланди. Йўлга еб қўйгудек тикилгани учунми, тезда толиқиб қолди. Лекин далада эгасиз юрган молларни жарақ-жарақ пулга айлантириш дарди унинг кучига куч қўшарди. «Чида, каллаварам, бундай қулай фурсатни яна топиб кўрчи!» — деб ўзига ўзи танабҳ ҳам бериб кўярди.

Урилган маккажўхоризор ичига кириб, туман бағрига сингиб кетганидан сўнг у катта йўлдаги ташқи оламдан бутунлай узилди. Машинани дўнглик томон тисариб қўйгач, мўлжалдаги сигир ва новвосни излашга киришди. Узоқ қидирмади. Бийдай даладаги ёлғиз жониворларнинг мўлаши олисдан кўлоққа чалинарди...

1990 йил 3 декабрь кuni Бувайда тумани ИИБга «Партсъезд» жамоа хўжалиги

аъзоси Юсуфжон Маҳмудов синиқ кайфиятда кириб келди.

— 1 декабрь кuni сигирим сомонга тушган игнадек изсиз йўқолди.

— Нега энди икки кун ўтказиб хабар беряпсиз?

— Дарағи чиқиб қолармикан, девдим...

Жиноят қидирув ходимлари жиғибийрон. Доим шундай. Ҳар бир мол ўғирлатган одам — Шерлок Холмс. Олдин ўзи изга тушади. Калава учи топилмагандан сўнг «дод» кўтариб, ҳасратини тукиб соладиган жой — милицияга чопади. Утган вақт ўғри учун аини муддао эканлигини ҳам шу ерда англайди. Жиноят қидирув ходимлари эса аламини ичига ютиб, ҳодиса жойига йўл олишади.

Маккажўхоризор четдаги дўнглик олдида тумандан бўккан ерда машина гилдираги қолдирган из топилди.

— «ГАЗ-53»га юклашибди, — дейишди милиция ходимлари

Худди шу кuni ўша даладан жамоа хўжалиги молбосари Комилжон Мирзаолимовга қарашли буқа ҳам ўғирланган экан. Барча таҳминлар элакдан ўтказилди. Бироқ жиноят очилмасдан қолаверди. Қидирув боши берк кўчага тақалди.

Орадан бир ойча вақт ўтди. Езёвон туманида ўғирлик мол ортилган машина тўхтатилди. Арқонни узоққа ташлаган терговчи «Партсъезд» жамоа хўжалиги аъзоларини Ленинград туманининг Зигир қишлоғида яшовчи Нуриддин Мамадалиев қақшатганини аниқлади.

Емоқнинг қусмоғи бор, деганларидек, туманга ишониб макруҳ ишга қўл урган Нуриддин бугун қилмишига яраша жазосини олди.

Ғ. ЖУРАЕВ.

ЁНҒИН ЧИҚДИ

22 август кuni соат 19 лардан ўтганда Тошкент шаҳрининг Қўйлик бозоридаги пойёфзал устахонасида ва унга туташ бўлган ошхонада ёнғин чикди.


Кўтарилаётган аланга қисқа муддат ичида даҳшатли тус олиб, бошқа дўконларга ҳам ўт кетиш хавфи туғилди. Симёғочнинг аланга ичида қолиши сабабли қисқа туташув юз берди. Натихада таҳликали вазият юзага келди.

Бир зумда бу ерда ҳозир бўлган Ленин тумани ИИБ қўриқлаш бўлимининг рота командири ўринбосари милиция капитани Суръат Тошкенбоев ва шу бўлим ходимлари милиция старшинаси У. Жамолдинов, милиция сержантлари С. Оловутдинов ва Р. Собировлар зудлик билан одамларни хавфли зонадан чиқиб кетишларини таъминладилар.

Ёнғин хуружини даф қилиш учун Ленин тумани ҳудудидаги ҳарбийлаштирилган ўт ўчириш қисмининг ички хизмат лейтенанти Пайзираҳмон Юсупов бошчилигидаги гуруҳи етиб келди. Ун кишидан зиёд жангчилар олтига ўт ўчириш машиналари ёрдамида фалокатни бартараф этдилар.

Ҳозир ёнғин сабаблари ҳамда давлатга келтирилган зарарнинг миқдори аниқланмоқда.

И. МИНАВВАРОВ.
«Постда» муҳбири.



ДОКА РЎМОЛ ҚУРИРМИКАН?

Замонлар ўзгариб, тўғрироғи одамлар ўзгариб, отабобларимиздан қолган: «Эрхотиннинг уриши, дока рўмолининг қуриши», — деган нақлга ҳам путур етди. Кейинги вақтларда Ильич туманида содир этилаётган оилавий жанжалларнинг баъзилари фожиали тугамоқда.

Бироқ ундан ҳеч ким тегиш-ли хулоса чиқариб олаётгани йўқ.

20 июль кuni Пахтаобод қўрғонининг Комсомол кўчасидаги 14-уйда яшовчи Урол Қўлдошев турмуш ўртоғига ўзаро низо пайтида пичоқ урган. Вувҳожар тан жароҳати олиб, касалхона-

га ётқизилган. Узини тутга билмаган, болалари келажакни ўйламаган Урол тергов идораларида бирор баҳона кўрсатолмай жавоб бермоқда. Мана сизга дока рўмолининг қуриши.

Ф. МАЛИКОВ.
милиция капитани.

ҲУРМАТЛИ МУШТАРИЙЛАР! ОБУНА ВАРАҚАСИНИ БЕХАТО ТЎЛҒАЗИШГА ҲАРАКАТ ҚИЛИНГ!

Агар обуна «Матбуот уюшмаси» агентлигида расмийлаштирилган бўлса, касса аппаратининг муҳри, алоқа бўлимларида расмийлаштирилганда эса тақвим штемпели, албатта, бўлиши керак.

Бу ҳолда обуначиларга абонемент билан бирга пул қабул қилинганлиги ҳақида квитанция берилади.

АЗИЗ ОБУНАЧИ УРТОҚЛАР!

Рўзнома ва ойномаларга обуна варақчасини сиёҳли ручкаларда хатосиз, сўзларни қисқартирмасдан ва тушунарли қилиб тўлғазинг.

Обуначи ўз турар жой манзилгоҳи, насаби, исми ва отасининг исмини аниқ ёзиши талаб этилади.

Обуна варақчасидаги «ПВ-Жойи» деган ёзувли катакларни алоқа бўлимлари ва «Матбуот уюшмаси» агентликлари ходимлари тўлғазди.

Пискент тумани ИИБ ходимлари жиноятчиликнинг олдини олиш учун кескин чоралар кўрмоқдалар.

Суратда: туман ИИБ бошлигининг тергов бўйича ўринбосари милиция майори Худойберди Ҳожиев жиноятга даҳлдор шахс билан суҳбатлашмоқда.
Х. ШОДИЕВ олган сурат

Қон ялаган қассоб

Наманган шаҳар Завқий номли кўчанинг 36-уйида яшовчи, 1958 йилда туғилган Иномжон Аюбовдан ҳамма хайиқади. Чунки бу йигитнинг кучи камида битта етилган новвосникига тенг. Устига-устак ўта баджаҳл. Унча-мунча одамни бир «сузиш»да йиқитади. Ишонган кишиларини айтмайсизми, вики-вики. Касбини сўрасангиз, Уйчи туманининг Машад қишлоғида жойлашган кооператив савдо сизга қарашли 2-гўшт дўконида қассоблик қилади.

Ижроқўмнинг қароридан бу ҳудудда мол гўштининг бир килоси 13 сўм деб белгиланган. Иномжон қассоб эса вилоят раҳбарининг қабул қилган қарорларига бир мунча «ўзгарттириш» киритди. Яъни гўштининг баҳосини 2 сўмга оширди. Тўғрида, ҳозирги замонда ҳар ким ўз билганидан қолмаепти-ку. Қолаверса, ўша қарорда: «Иномжон қассобга ҳам тегишли», — деган бандининг ўзи йўқ эди.

Қарабсизки, «ишбилармон» дўкондорнинг пичоғи мой устида. Узингиз ҳисоблаб кўринг-а, агарда у кунига ҳар бири ўзидек келадиган иккита буқани сўйиб сотса, нақд 600 сўм «соф» фойда қолади. Харидорлар эса қассобнинг раъйига қарши боришолмайди. Сабаби эса маълум: 8 номус кучли ёки ўзлари кучсиз.

— Пичоқ суякка бориб қаллади, — деди ҳозиргина уч кило гўштин 45 сўмга харид қилган бир мўйсафид участка вакили Иззатулла Бозоровнинг хонасига кираркан.

Ўзига бириктирилган ҳудуддаги дўконда нималар бўлаётганидан беҳабар қолган милиция катта лейтенанти И. Бозоров шикоят билан келган бу кишини ўрнидан туриб кўтиб олди.

— Шу десанг, ўртоқ участкавий, Иномжон қассоб бизни

пичоқсиз сўйяпти-ку. Пулимизни иликдек сўриб оляпти, ахир. Номисофим са-ал тартибга чақириб қўймасаиғ бўлмайди.

Участка вакили уни гапларини обдон тинглади. Кейин эса биргалашиб дўкон томоғи жўнаб кетишди. Йўлакай эса яна бир қанча гўшт қўлтиқлаган кишилар билан ҳам суҳбатлашди. Ҳаммаларининг фиғонидан дуд чиқарди.

Участка вакилини бу иш билан қизиқётганидан хурсанд бўлган йўловчилар ҳам изларига қайтдилар.

— Тишингиз ўтадиган одамнингизни олдига бориб, ўшага лекциянгизни ўқинг, — дед пичқирди Иномжон қассоб.

Участка вакили эса хотиржамлик билан содир этилган қонунибузарлик ҳақида ҳужжат расмийлаштираверди. Гувоҳларини имзо чекаётганини кўриб, иш чаппасига кетишдан чўчиган И. Аюбов энди ялина бошлади. Яна бўлмади. Дўқ уриб ҳам кўрди. Фойда чикмади. Кейин эса эски ҳунарини қўллашга киришди. У бироз кўз қирларини участка вакилига тикканча ўкириб турди-да, кундадек келадиган калласи билан милиция ходимини «сузиб» юборди. Бировга қулоқ солмаган безорни тажовузини давом эттираверди. И. Бозоровни ўлдириб ташлаш билан қўриқди.

Тан жароҳати олган участка вакили ҳимоя чорасини қўллашга мажбур бўлди. Шундагина қон ялапан қассоб бўғизланаётган хўкнздек гурсиллаб йиқилди.

Ҳозирда Иномжон Аюбовнинг қилмишларини адолат тарозисига солиб кўриш учун «ишлов» кетаяпти.

О. МАҲАМАДАЛИЕВ.
Уйчи тумани ИИБ бошлигининг ўринбосари милиция майори.

Ф. СП-1

ССЖИ Алоқа вазирлиги «Матбуот уюшмаси»
"ПОСТДА" 64615
(нашр номи) (нашр кўрсаткичи)

рўзномасига ОБУНА

обуна сон

1992 йил учун (ойлар бўйича)

Table with 12 columns for months and rows for subscription details.

Қаерга

(почта кўрсаткичи)

(манзил)

Кимга

(насаби; исми ва отаси исмининг бош ҳарфлари)

РўЗНОМАНИ ЕТКАЗИШ ВАРАҚЧАСИ

Form with fields for name and surname.

64615

(нашр кўрсаткичи)

"ПОСТДА"

(нашр номи)

Table with columns for subscription type and amount.

1992 йил учун (ойлар бўйича)

Table with 12 columns for months.

Қаерга

(почта кўрсаткичи)

(манзил)

Кимга

(насаби; исми ва отаси исмининг бош ҳарфлари)

МУХЛИСЛАРИМИЗ ДИҚҚАТИГА!

«Постда» рўзномасига барча алоқа бўлимларида 1992 йил учун обуна чекланмаган миқдорда қабул қилинмоқда.

Рўзноманинг обуна рақами (индекси) — 64615. Обуна баҳоси — бир йилга 15 сўм 60 тийин, олти ойга 7 сўм 80 тийин, уч ойга 3 сўм 90 тийин.

Очил Умматов деганлари ҳаммага отнинг қашқасидай таниш эди. Еши эллик бирни қоралаб кўйган бўлсада, топганини ичкиликка сарфлаб, бошпана топиш ёки оила кўриш деган нарсаларни буткул унутиб кўйган одам.



бояги бўшаган шишалар ёнига ағанашиди. Яна олишишди.

— Мана, энди кунинг битди! — деди мезбонни босиб олган Очил пишиллаб нафас оларкан ва ёнидан қайчи чиқариб, бўйнига ва орқа миясига санчди.

Халил бир-икки тўлғандию ёруғ дунёдан буткул ағанаб кетди. Шундан кейингина Очил нима қилиб кўйганини ўйлаб етди.

— Нима қилиб кўйдинг, овсар! Лекин оҳ-вой қилиб ўтирадиган вақт эмас. Дарров ўзини кўлга олди.

Шу ниятда жасадни азод кўтардида, кароватга ётқизди Кейин... ўт кўйиб юборди.

Иўк, воқеанинг ривожини у ўйлагандек кечмади. Булунгур тумани ички ишлар бўлими ходимлари барибир уни тутиб олишди.

Нишон МЕЛИЕВ.



Боягина ялаб-юлкашаётганлар шу заҳоти муштираш бошладилар. Ҳазабдан қаттиқ тугилган муштра ҳар иккисининг оғзи демай, кўзи демай туша кетди.



«Нафсоният»

Ассалому алайкум, қадрдонлар! Орадан анча вақт ўтиб кетди, юз кўришолмаймиз. Ҳойнаҳой, ўзи соғ-омонмикан, деб хавотир олган бўлсаларингиз керак-а! Ҳа, баракалла, сездим-а, девор бўлмаса, кўчани кўраман, ҳа!

Икки ой олдин қизиқ воқеа бўлди, денг. Қишлоқдан келган бир отахон ёнидан гулли носқовоғини чиқардида, кафтини тўлдириб носвой тўкди, кейин оғзини каппа очиб, тилининг тагига ташлади.

— Бу дунёда нафсоният анқонинг уруғи бўлиб кетди, болам, — деди «шу-шу»лаб.

Ундай эмас, деб роса тортишдим Кейин сафарга отландим. Нафсоният борми, деб лоф бўлмаса, мингдан ортиқ одамдан сўрадим. Ҳайрият, ниятимга етдим.

Сизлардан яширадиган сирим йўқ, қадрдонлар. Келинлар, мана бу мактубни биргаликда ўқиймиз.

«Хурматли Хушёрбек!

Мени биласанми-йўқми? Шунақада, камина сингари фақирпачоқларни билмайсанда! Майли, мен кайфим йўқ пайтида ўзимнинг соямга ҳам салом берадиган камсукум одамман. Ўзимни таништириб кўяй: Риштон шаҳрига бориб, Абдулло Раҳимов ким, десанг, мишиғи оқиб юрган боладан тортиб, бурни билан ер чизиб юрадиган чол-кампиригача дарров уйимни кўрсатиб кўйишади.

Яна қулоққа лағмон осяпти, деб ўйламагини отнинг қашқасидай маълум ва машҳурман. Чунки бу дунёда нафсониятни оқ ароқдан кейинги фахрли иккинчи ўринга кўядиган «хўрозлар кам. Биз эса ўша тоифаданмиз.

Яқинда кечга томон омад кулиб боқди-ю, «севгилим» билан висол оқшоми қилдик. Нима, э, йўқ, чолни кўриб бува деявермагинда, саккиз нафар чурвақалари бор одамга уйланишни ким кўйибди? «Севгилим» — бу ўша, соҳибжамол «Русская водка». Унинг васлига етишган кун мен учун висол оқшоми! Шунақа.

Хуллас, эртаси куни уйғонганимда бошим ари уясидек ғувилларди. Карахтман. Висолдан кейинги айрилиқ азоби ёмон. Табиб табиб эмас, бошидан ўтказган табиб. Нимадир бўлдию кизим Ортиқбону жаҳ-

лимни чиқариб юборди. Улганинг устига тепган, деганларидек, онам ҳам нимадир, деди.

Хув, боя айтдим-ку, мен учун энг қадрли нарса «севгилим», иккинчиси нафсоният. Уша, дегин, чирқирворди. Аввало ота бўлсанг, қолаверса, эркак! Жаҳл билан бостирмага яқинлашдим. Узям 60 боғ поянинг асабларимга ўхшаб қовжираб-чирсиллаб турган экан. Гугурт чақишим билан «лов» этиб ёнди-кетди.

Ана энди «хўроз»лигимга ишондингми? Аввал пичоқни ўзингга ур, оғрилмаса бировга, дейишади. Мен шундай қилдим. Қўшнингиз эмас, ўзимнинг поямни куйдирдим.

Олов бир грамм ҳам тутамасди. Унинг зангори тили зум ўтмай онам яшайдиган уй айвони пештоқини ямлай бошлади. Энди ёғочлар ҳам ёна бошлади.

Кўни-кўшнилари челақ кўтариб югуришди. Кимдир «пожарний»га сим қоққан экан, чиқиллаб ўт ўчириш машиналари ҳам келди. Хуллас, ўтни ўчиришди. Ҳа-ҳа, ўзлари ўчиришди. Мен эса икки қўлимни киссамга тикиб, уларнинг ишини назорат қилиб турдим. Нафсониятим кучлида, ўзим ёқиб, ўзим ўчираманми? Ҳеч қачон!

Лекин бу гумроҳ одамлар мени тўғри тушунишмайди. Суд қилиб, ўзларича «жазолашди». Ҳа, майли, хўроз йигитнинг бошидан не ишлар ўтмайди, дейсан, чидадим.

Кейин ўйлаб қарасам, ким кўп — ёзмаса қўли қичийдиган ёзувчилар кўп. Бу ишларни ҳаммага дoston қилиб юбормасин, дедиму ўзим қўлимга қалам олдим.

Хушёрбек, сендан илтимос, мана ҳамма гапдан хабардор бўлдинг. Бошқа биров эшитмасин.

Камоли эҳтиром билан Абдулло Раҳимов.»

Ана шунақа, азизлар! Абдуллонинг «нафсонияти» билан кисман танишдингиз. Халқимизда йигит кишининг сўзи ўлгунча, шайтонининг бўйини узилсин, деган гап бор. Келинг, Абдуллонинг ҳам сазаси ўлмасин, унинг қилмишини сиз эшитдингиз, бошқа ҳеч ким билмасин. Оғзингиздан гуллаб кўйманг, хўпми!

Хушёрбекнинг котиби Алп ЭРДОН.

САХИЙЛИКНИ ҚАРАНГ

Бекобод шаҳар 9-автокорхона ҳайдовчиси О. Элчиев дўпписини бошидан олиб мундоқ ўйлаб қараса, шу 50 сўмга унчалик зориқиб ҳам қолмаган экан. Энди жамоа ўртасида тўкилган обрўсини ҳеч қандай пулга топа олмаслиги аниқ.



У шаҳар қурилиш материаллари заводидан объектга бетон қоришмаси таширди. К. Хўнамуродовнинг илтимосига кўра давлат баҳоси 134 сўм 88 тийин турадиган 1,6 кубометр бетон қоришмасини кўшни Тожикистон ССЖ Нов туманида қуриляётган уйга келтиради. Ундан 50 сўмгина ҳақ олади.

О. Элчиев қоришмани ўз баҳосидан 84 сўму 88 тийин камига сотадию бунга сахий демай бўладими? Аммо нега бу ҳотамтойлик давлат ҳисобидан қилинади? Шуниси қизиқда.

Б. БОТИРОВ.

Суратда: Н. МАКСЮТОВА.

Мухаррир Зокир ОТАЕВ.

МАНЗИЛГОҲИМИЗ: 700029, Тошкент, Лопатян кўчаси, 1.

Ўзбекистон Компартияси Марказий Қўмитаси нашриётининг Меҳнат Қизил Байроқ ордени босмаханаси 700083, Тошкент, Ленинград кўчаси, 32.

Телефонлар: Мухаррир, муҳаррир ўринбосари — 39-77-23, 37-23, 46-56 (ички).

«ПОСТДА» — («НА ПОСТУ») Орган коллегии МВД УзССР 26609 нускада чоп этилди.